

Acuerdonan sumamente importante firma entre promotornan local

OTI, Voz di Oro, Voz Supremo, Premio MoTito y Rufo Wever, tur lo tey bek!



ORANJESTAD (AAN): Si-man pasa, Joy Kock y Edjean Semeleer a yega na un acuerdo concreto, pa asina rebiba e proyectonan cu un tempo a sirbi como plataforma sumamente importante pa nos artistanan local por a expone nan talento y nan arte. Ambos tin varios aña expresando na otro nan deseo di hinca bida back den e eventonan aki cu un tempo tabata e eventonan mas importante y prestigioso pa tur nos artistanan local.

Den pasado e festivalnan manera Festival di OTI, Voz

di Oro, Voz Supremo, Voz Juvenil, Festival di Festivalnan y Premio Motito y Rufo Wever no tabata djis cualkier evento, sino E eventonan cu a cambia bida di varios di nos cantantenan. Ciertu di e eventonan aki tambe a duna varios pais Iberoamericano hopi prestigio di tin talentonan asina grandi bibando riba nan. Pesey mes, a bin cu e iniciativa di rebiba e tipo di eventonan aki.

Joy Kock, e cerebro y motor tras di tur e produccionnan aki, gran baluarte local pa su lucha y empeño semper

di a stimula e talento local y expone e talentonan aki riba un escenario internacional, ta sumamente contento y orguyoso cu un artista hoben, cu a demostra su calidad y capacidad no solamente riba escenario como artista/cantante pero tambe como productor di shownan grandi y exitoso y sin lubida eventonan ariba nivel excepcional, lo ta esun pa rebiba e produccionnan excelente aki y sigura existencia di cada un di nan pa hopi aña nos dilanti.

Pa añanan largo Joy a desplega un trabao magnifico como promotor di su artistanan local y ta goza di un respet, admiracion y cariño impresionante den nos pueblo. Edjean Semeleer di su banda, semper a demostra un

respet y admiracion inmenso na e grandinan cu tabata activo den e mundo artistico local prome cune, y cu a habri caminda pa esnan mas hoben manera e, por a expone nan arte na un publico grandi.

Edjean a expresa su satisfaccion y gratitud enorme cu Joy a demostra confianza total den su persona y a permiti'e tuma e batuta over pa asina rebiba y sigui organiza e produccionnan musical aki cu tanto ta haci falta aki na Aruba.

E agilidad cu ya a demostra den rebiba e proyectonan aki ta bisto, pa e hecho cu ya caba por ehempel a re-activa contactonan internacional y a drenta den contacto cu e organizacion cu ta propietario di OTI, cu tin su base na Mexico, cu ta

sirbi tambe como pais sede. Pues den futuro cercano nos lo haya sa mas di e empuhe aki, pero si Edjean a laga sa cu tin plannan grandi biniendo pa Aruba muy pronto.

Un cos ta sigur. E anuncio aki, di un decision concreto y real pa rebiba entre otro Festival Voz di Oro, Voz Supremo, un festival local y internacional di interprete y composicion manera OTI, Premio Motito y Rufo Wever, sigur ta un noticia masha alentador pa tur nos artistanan local, mirando cu mas y mas nan lo haya e oportunidad di ta protagonista back, no solamente riba e escenario local, pero tambe riba escenarionan internacional. DIARIO lo ta hopi pendiente pa e desaroyonan aki.